

Informacija o posjeti Kraljevini Švedskoj

07.09.2015 00:49



U okviru CILAP (Capacity Building for Improvement of Land Administration in BiH) projekta delegacija BH je od 2. do 4. septembra 2015. godine posjetila Lantmäteriet (švedska uprava za kartografiju, katastar i upis prava) i Ministarstvo preduzetništva i inovacija u Vladi Kraljevine Švedske. Delegaciju BiH su činili: ministar pravde FBiH g. Mato Jozić, predsjedavajuća Doma naroda Parlamenta FBiH gđa Lidiya Bradara, predsjedavajući Predstavničkog doma Parlamenta FBiH g. Edin Mušić, direktor Federalne uprave za geodetske i imovinsko-pravne poslove g. Željko Obradović, poslanici g. Bajro Makić (SDA), g. Jusuf Bubica (BPS) i g. Salem Halilović (SBiH), direktor Republičke uprave za geodetske i imovinsko-pravne poslove uprave RS-a g. Miloš Komljenović, g. Slavoljub Stojanović (Ministarstvo finansija), gđa Brankica Grahovac (Ministarstvo pravde), gđa Natalija Čulić (Porezna uprava RS) i g. Darko Mišković, savjetnik u Republičkoj upravi za geodetske i imovinsko-pravne poslove RS-a. Prvog dana posjete u prostorijama Lantmäterieta direktor Bengt Kjellson je održao prezentacije o organizaciji švedske geodetske uprave te o rezultatima i prednostima objedinjavanja katastarske i zemljišnoknjižne evidencije. Naime, Bosna i Hercegovina i Švedska imaju sličnu historiju nastanka i organizacije zemljišne administracije te je bilo korisno čuti švedska iskustva organizacije, aktivnosti i vizija u sektoru zemljišne administracije. Potom je pomoćnik direktora Mats Snäll održao prezentaciju novoga sistema za upis prava u Kraljevini Švedskoj. Nakon toga se u zajedničkoj diskusiji raspravljalo o trenutnim aktivnostima na

polju zemljišne administracije u obje zemlje i mogućnošću razmjene određenih iskustava. Lantmäteriet već tri godine pruža podršku sektoru zemljišne administracije u BiH, posebno u dijelu izgradnje kapaciteta i realizacije ključnih projekata u izgradnji kvalitetnog katastarskog i zemljišnoknjižnog sistema u oba entiteta u BiH. Drugog dana posjete delegacija BiH je primljena u prostorijama Vlade Kraljevine Švedske u Štokholmu gdje su razgovarali s predstavnicima Ministarstva preduzetništva i inovacija, na čelu s državnim sekretarom g. Connyjem Whlströmom i gđom Monicom Lagerqvist-Nilson. Delegacija je upoznata s aktivnostima Ministarstva, a u razgovorima su razmijenili iskustva dviju država u domenu funkcioniranja zakonodavne i izvršne vlasti i trenutnog stanja na polju privrede i zemljišne administracije. Predstavnici BiH su se posebno zahvalili predstavnicima Vlade Kraljevine Švedske na podršci i pomoći koju pružaju realizacijom raznih projekata koji su od ključne važnosti za razvoj Bosne i Hercegovine, posebno u sektoru zemljišne administracije i evidencije nekretnina. Ova posjeta je bila organizirana od strane projekta CILAP i direktorice projekta gđe Anđe Zimić te dviju entitetskih uprava za geodetske i imovinsko-pravne poslove.